

讀史方輿紀要/卷三十八



以2024年7月25日从维基文库导出

山東九外國附考

◇朝鮮在遼東都司東千八百里。東至海七百七十里，南至海千三百里，西南至海八百里，西北至鴨綠江七百五十里，北至女真界千四百里。自其國都至京師三千五百里，至江南江寧府四千里。古朝鮮國，箕子所封。戰國時，燕略屬真番、朝鮮，爲置吏築障塞，遂爲燕地。秦爲遼東外徼。漢初屬燕國，燕王盧綰叛入匈奴，燕人衛滿竊據其地。武帝定朝鮮，爲真番、臨屯、樂浪、玄菟四郡。昭帝並爲樂浪、玄菟二郡。後漢末爲公孫度所據。至公孫淵，魏滅之。晉永嘉末沒於高麗。高麗者，扶餘別種，《東夷傳》云：「即高句驪也。其族有五：

「一消奴部，一絕奴部，一順奴部，一灌奴部，一桂婁部。其後桂婁亦名內部，又曰黃部。絕奴亦名北部，又曰後部。順奴亦名東部，又曰左部。灌奴亦名南部，又曰前部。消奴亦名西部，又曰右部。各有耨薩主

之。耨薩蓋酋名也。大抵東漢時，高句驪部落漸盛，後遂建國，仍號高句驪，以高爲氏。三國魏正始七年幽州刺史毋丘儉討破之，尋復據其地。晉咸康八年其王高釗爲慕容燕所破，至曾孫璉益強。宋元嘉十二年璉遣使入貢於魏，魏封爲高句驪王，居平壤城，即漢樂浪郡地。齊永昭九年璉卒，壽百餘歲，子云嗣，請命於魏。明年，魏主宏冊雲督遼海諸軍事，遼東公，高句麗王。梁天監十八年雲卒，子安立，遣使入貢於梁，梁以安爲寧東將軍，高句麗王。後亦臣附於東魏、高齊。隋開皇十七年高麗王湯謀治兵拒隋，隋主賜璽書責其稱藩，湯受命。會卒，子元嗣，隋仍封爲王。明年，元帥靺鞨之衆寇遼西，隋營州總管韋衝卻之。隋因伐高麗，元遣使謝罪，乃罷兵。大業七年討高麗。明年，發二十四軍分道並進，總集平壤，不能克。九年復伐高麗。十年復伐之。凡四伐而不能克。唐武德四年高句麗王建武遣使入貢，建武即元之弟也。七年冊建武爲遼東郡王。貞觀十六年高麗東部大人泉蓋蘇文弑其王建武，改立其弟子臧。十八年伐高麗，明年，親往征之，諸軍分道並進，克遼東等數城而還。自是數遣軍伐高麗。總章初李勣攻高麗，拔平壤，置安東都護府，由此

高氏滅。儀鳳初新羅據其地。開元以後，並於勃海大氏。天祐初大氏衰，有眇僧躬者，聚衆據開州稱王，號大封國，遂有高麗故地。五代梁龍德二年高麗人王建者，起兵爲海軍統帥，襲殺躬，自稱高麗王。唐清泰末建引兵擊破新羅百濟，而併其地，於是東夷諸國皆附之，地益拓，建都鬆岳，即開州也，謂之東京，而以平壤爲西京。又置六府九節度，百二十郡，以理其地。晉開運二年建卒，子武代立，自後子孫遣使朝貢於宋，亦朝貢於契丹及金。宋嘉定十二年高麗王暉附於蒙古，既而中絕。紹定五年蒙古主窩闊臺遣兵伐高麗，其王暉復請降，因置京府縣達魯花赤七十二人監其國，端平初悉爲高麗所殺。自是四遣兵攻之，拔其城十有四，大抵旋服旋畔。景定初忽必烈以高麗世子ㄚ典襲封高麗國王，ㄚ典尋更名植。元至元中其西京內屬，因置東寧路總管府，畫慈悲嶺爲界。大德三年又置征東等處行中書，尋罷。至治三年復置，命其王爲左丞相。至正之季，始二於元。及明朝洪武二年高麗王王顥表賀即位，詔封高麗國王。二十五年其王瑤昏繆衆推門下侍郎李成桂主國事，詔從其自爲聲教，成桂更名旦，徙居漢城，遣使請改國號，詔更號朝鮮，自是王氏始絕，李

氏世有其地，稱藩歲奉貢獻。萬曆二十年爲日本所侵掠，國幾亡，王師入援，久之，國始定，然自是浸弱矣。其國中分爲八道，八道中則忠清、慶尚、全羅三道，地廣物繁，州縣雄巨，最爲富庶。且俗尚詩書，人才之出，比諸道倍多。平安、咸鏡二道，北接靺鞨，俗尚弓馬，兵卒精強，亦地勢使然也。江原、黃梅，居京畿左右，差爲狹小。而京畿在諸道之中襟帶山海，稱爲雄勝。其地東西二千里，南北四千里，八道分統郡凡四十一、府凡三十三、州凡三十八、縣凡七十。

京畿道，治王京。朝鮮都也，亦曰漢城。明初高麗王旦自開州徙此，居七道之中稱爲四塞，領郡三，曰楊根、豐德、水城。府三，曰漢城、開城、長湍。州七，曰楊州、廣州、潤州、驪州、果州、谷州、坡州。縣三，曰交河、三登、土山。

開州城，在王京西南二百里，高麗所置州也，左溪右山，稱爲險固，亦曰松岳。唐天祐初眇僧躬據此。朱梁貞明五年入貢於淮南楊隆演。後唐清泰末王建殺躬而代之，仍都於此，謂之東

京，亦曰開京。宋大中祥符三年高麗臣康肇弑其主誦，立誦兄詢而相之。契丹主隆緒討高麗，渡鴨綠江，康肇戰敗，退保鋼州，契丹進擒肇等，追亡數十里，鋼、霍、貴、寧等州皆降。進攻開京，詢棄城走平州，契丹遂焚開京宮室府庫，民廬俱盡。兵還，詢復葺開京而居之，諸城亦復歸高麗，今日開城府。

丸都城， 在王京東北。昔時高句驪依險爲城，謂之丸都，旁多大山深谷。陳壽曰：「漢建安中高麗王伊奚模更作新都於丸都山下。魏正始七年幽州刺史■丘儉以高句驪數侵叛，督諸軍出玄菟討之，高句驪王位宮敗走，儉懸車束馬以上丸都，屠其城，既而復都於此。晉咸康八年時高句麗與慕容■接境，■謀擊之，高驪以重兵備北道，■潛將勁兵四萬趨南道，出其不意，高麗王釗敗遁，遂入丸都，毀其城，大掠而還。《唐志》：「自鴨綠江口舟行百餘里，乃小舫溯流，東北行，凡五百三十里，而至丸都城。」

臨屯城， 在王京西南。漢元封二年置臨屯郡。《茂陵書》：「郡治東■施縣，去長安六千一百三十八里，領十五縣，昭帝時郡廢。■施，音

移。《漢志》：「東施縣屬樂浪郡。是也。後漢並廢縣。又真番城，在王京西北，漢元封二年置真番郡。《茂陵書》：「郡治，去長安六千六百四十里，領十五縣。昭帝時，亦併入樂浪郡。縣，《漢志》不載。徐廣曰：「遼東郡有番汗縣，疑即真番。○含資城，在王京南境，漢樂浪郡屬縣也，後漢因之，晉改屬帶方郡。《漢志》注：「縣有帶水，西至帶方入海。隋大業中伐高麗，分軍出含資道，蓋以漢縣爲名耳。

吞列城，在王京東南。漢縣，屬樂浪郡，後漢省。《漢志》注：「列水出分黎山西，至粘蟬入海，行八百二十里。列亦作冽。又有列口城，亦在王京西南，漢縣，屬樂浪郡，晉復屬帶方郡。胡氏曰：「列口，冽水入海之口也。漢元封二年楊僕擊朝鮮，先至冽口。張晏曰：「朝鮮有濕水、列水、汕水，三水合流爲冽水，樂浪、朝鮮，疑皆取名於此。

豐德城，在王京南，朝鮮置豐德郡於此。萬曆二十年倭自釜山潛渡臨津，分兵陷豐德諸郡，朝鮮王李公倉卒棄王京奔平壤，即此。○孟州城，

在王京西。志云：「唐置孟州，領三登一縣，椒島、楸島、寧德三鎮，今州廢縣存。

北嶽山， 在王京城北。萬曆中倭據王城，背嶽山面漢水爲營，即此。○龍山，在漢江東南。萬曆中倭敗於平壤，遁還龍山，李如松從間道襲倭，盡焚其積粟處也。又天寶山，在王城西境。萬曆中李如松遣將屯寶山以拒倭，即此。

神嵩山， 在開城府北。五代時，王建依此山爲都，因名其城爲松岳。志云：「朝鮮有三都，謂平壤、漢城及松岳也。又有平山嶺，在開城府西一里，其土色皆赤。

江華島， 在開城南海中。元時，高麗王植庶族承化侯居此。《圖經》：「今有江華府，蓋以島名。○紫燕島，在廣州海中舊有客館，曰廣源亭。又有島曰和尚島。又大青嶼，亦在廣州海中一名大青島。元文宗徙其兄子妥歡帖木爾於高麗，使

居大青島，尋徙於廣西靜江。是也。又有小青嶼，亦在廣州海中。

漢江，在王京南十里。源出金剛、五臺二山，合流入海，王城恃以爲險。江之南即古百濟國地也。萬曆中李如松援朝鮮，倭棄王城遁，如松入城，以兵臨漢江尾倭後，欲乘其惰歸擊之，不果。

楊花渡，在王京西南，漢江之濱。朝鮮各道饋餉，皆聚於此。或曰即臨津渡也。萬曆中倭渡臨津，掠開城，既而李如松駐聞城，遣別將查大受據臨津，爲東西策應，即此。○禮成港，在開城府南，下流入於海。又急水門，《一統志》云：「在開城府南海中宛如巫峽。又有蛤窟，亦在開城南海中山頂有龍河。」

碧蹄館，在王京西三十里。其東有橋曰大石橋，萬曆中李如鬆與倭戰處。

江原道，治江陵府，在王京東面。本穢貊地，漢爲臨屯境，領郡七：「曰忸城、平海、通川、寧越、松岳、旌善、高城，府五：「曰江陵、淮陽、三陟、襄陽、鐵原。州四：「曰原州、江州、槐州、冥州，縣十：「曰平康、安昌、烈山、麒麟、酒泉、丹城、蹄麟、蔚珍、瑞和、歙谷，是也。

大海，在江陵府東。《一統志》：「朝鮮之境，東西南三面皆瀕海，其東水淡清徹，下視十餘丈。

黃海道，治黃州，在王京西面。古朝鮮地。領郡三：「曰遂安、延安、平。音男。府三：「曰平山、瑞興、承天，州五：「曰黃州、白州、海州、愛州、仁州，縣八：「曰安岳、三和、龍岡、咸從、江西、牛峰、文化、長淵。

海州城，在黃州西南二百餘里，以濱海而名。又東北即安岳縣也。志云：「境內有安岳、

三和、龍岡、咸從、江西五縣。長命一鎮，今俱屬黃州，皆唐置，元因而不改。

平山城，在黃州東北百里，或曰舊名甌山府，西接黃州，東連平壤，其相近者有瓊山，今爲平山府。

金堂山，在黃州三和縣之西北。志云：

「三和在黃州西南百里。又州境有政方山。

海，在黃州西百里。志云：「西大海在黃州長命鎮，東流入大通江。又白州、海州之西，皆迫近海濱。

月不唐江，在黃州安岳縣之東，其水西流入海。志云：「安岳在黃州南百五十里。是也。

全羅道，治全州，在王京西南面。本馬韓地，後爲百濟國。唐顯慶五年蘇定方伐百濟，擒其王，置熊津等五都督府，後並於新羅。五代時，高麗兼有其地。

《圖經》：「朝鮮地界，正北從長白山發脈，南跨全羅界，西南盡於海。日本對馬諸島，偏在朝鮮海洋之東南，與慶尚之釜山相對，倭船止抵釜山，不能越全羅至西海，故八道之中惟全羅一道，直北正南，其迤西則與遼東對峙。日本所以隔絕遼、薊，不通海道者，恃有朝鮮。而朝鮮所以保固邊陲，控禦諸夷者，恃有全羅也。

志云：「全羅之地，南濱大海，東接慶尚，爲朝鮮門戶，倭犯朝鮮，此其必由之道也。領郡三：「

曰靈巖、古阜、珍島。府二：「

曰全州、南原，州四：

「曰羅州、濟州、光州、昴州，縣二十三：「曰萬頃、茂長、鎮安、扶安、全渠、康津、興德、黃成、樂安、昌平、濟南、會寧、大江、臨波、古阜、南陽、富

順、扶寧、麻仁、緒城、海南、神雲、移安。

南原城，在全州東南，與全州相犄角，爲王京要隘。萬曆中倭陷南原，遂犯全羅，進逼王京，李如松謂全羅饒沃，南原尤其咽喉，是也。其相近者有云峰城，亦爲衝要。○南陽，在南原府西北，

朝鮮之南陽縣也。萬曆二十二年李如松命將守南原，分兵屯禦於此。

濟州城，在南原府海島中。亦曰濟州島。朝鮮置州於此。志云：「朝鮮之濟州，猶中國之瓊州。或曰：「即故耽羅也。元大德五年置耽羅軍總管府，又沿海立水驛，自耽羅至鴨淥江，並楊村梅口，凡三十所，今仍曰濟州。又珍島城，在濟州西海中珍島上，亦曰珍島郡。宋咸淳六年高麗叛人裴仲孫立高麗王植庶族子承化侯爲王，竄入珍島，蒙古討平之。

大江城，在南原府東南，朝鮮所置縣也。又東接慶尚之晉州。萬曆中倭屯釜山浦，李如松分遣諸將屯大江、忠州以扼之。既而倭從釜山移西生浦，劉廷留鎮朝鮮，分屯慶尚及大江，蓋扼要處也。或作大丘，悞。○處仁城，在全州西。宋紹定六年蒙古窩闊臺遣將撒禮塔攻高麗，至王京南，攻其處仁城，敗死。又党項城，在全州東北。唐貞觀十二年百濟與高麗連和，伐新羅，取四十餘城，又謀取党項城，絕其貢道云。

俱拔城， 在全州。《南北史》：「百濟都俱拔城，亦曰固麻城。其外更有五方，中方曰古沙城，東方曰得安城，南方曰久知下城，西方曰刀光城，北方曰熊津城。是也。唐顯慶五年蘇定方下百濟，留劉仁願守百濟府城，即俱拔城矣。」

任存城， 在全州西，古百濟所置城也。唐龍朔初百濟餘衆復叛，劉仁軌破之於熊津江口，其衆釋百濟府城之圍，退保任存城。任存，百濟西部也，依任存山而名。三年仁軌遣兵攻任存城，拔之。又真峴城，在全州北，唐龍朔二年時劉仁軌既解百濟府城之圍，還軍熊津城，有詔班師。仁軌曰：「今以一城之地，居敵中央，動足輒爲所擒。正宜堅守觀變，乘便取之，不可動也。於是出兵掩其支羅城，拔之。並拔其尹城、大山、沙井等柵。時敵以真峴險要，加兵守之，仁軌復伺其懈，引兵襲據之，遂通新羅運糧之路。《唐書》：

「支羅、真峴諸城，俱在熊津之東。」

周留城， 在全州西。又西北有加林城。唐龍朔三年百濟故將福信等據周留城，劉仁軌既拔真峴，諸將以加林水陸之衝，欲先攻之。仁軌曰：

「加林險固，攻之不易，周留彼之巢穴，宜先取之。遂定計自熊津進破百濟之衆於白江口，趨周留城，拔之。

熊津城，在全州西北，即熊津江口，百濟之險要也，置城於此，爲五方之一。唐顯慶五年蘇定方討百濟，自成山濟海，百濟據熊津江口以拒之，定方擊破之，直趨其都城，遂克之。唐亦置熊津都督府，以守其地。龍朔初百濟復叛，圍百濟府城，詔劉仁軌赴援，仁軌轉鬥而前，所向皆下。百濟立兩柵於熊津江口，仁軌擊破之，府城之圍遂解，仁軌因駐守於此。既而再破百濟餘衆於熊津之東，復平百濟。或曰：「今漢江口，即古置城處雲。

白山，在全州南海中或以爲即白水山。唐咸亨三年高侃擊高麗餘衆於白水山，破之。又有黑山，亦在全州南海中俱有澳，可以藏舟。

羣山島，在全州南海中。十二峰連絡如城，舊有客館，曰羣山亭，又有五龍廟。○白水島，亦

在全州南海中其相近者曰闌山島。

大月嶼， 在全州南海中。又有小月嶼，與大月嶼對峙如門。○菩薩苦，亦在全州南海中。《圖經》：「小於嶼而有草木曰苦。其與菩薩苦相近者，曰紫雲苦、苦苦、春草苦、跪苦。又有檳榔焦，亦在全州南海中。《圖經》：「如苦嶼而其質純石者曰焦。

熊津江， 即漢江也。舊爲百濟、高麗分界處。江口接大海，爲登涉要津。唐時百濟存亡，係於熊津江口云。○白江，在熊津東南，亦接大海，達全州西界。唐龍朔三年劉仁軌引舟師自熊津趣周留城，時百濟請援於倭，至白江口，遇倭兵，仁軌四戰皆捷，焚其舟四百餘，進拔周留，遂平百濟。是也。

井邑鎮， 在全州東北。或曰：「即百濟之故沙井寨也。明萬曆中倭行長犯王京，退屯井邑，去王京六百餘里。

慶尚道，治慶州，在王京東南。本辰韓地，後爲新羅國。濱海與日本相對，爲朝鮮之屏蔽。領郡七：

「曰蔚山、咸陽、熊川、陝川、永川、梁山、清道，府六：「曰金海、善山、寧海、密陽、安東、昌原，州五：「曰慶州、泗州、尚州、晉州、蔚州，縣十二：「曰東萊、清河、義城、義興、聞慶、巨濟、昌寧、三嘉、安陰、山陰、高靈、守城。

蔚山城，在慶州西北，即蔚山郡也。南有島山，不甚高，而城皆依山險，中有江，通釜山寨，陸路則由彥陽監通釜山。萬曆二十五年倭屯蔚山，大帥麻貴攻之不克，既而倭益築城寨，據守於此，謂之東路。麻貴復進師逼之，據險收其禾稼，倭詭卻以誘之，貴爲所敗。

順天城，在慶州西南。萬曆二十六年倭酋據此，謂之西路。《朝鮮紀事》：「倭酋行長據粟林，曳橋建寨數重，憑順天城，與南海營相望，負山襟水，最爲扼塞，大帥劉廷攻之不能克。

泗州城，在慶州西。或曰：「即古泗城也。唐龍朔初百濟復叛，與劉仁願等相持，詔新羅應援。新羅將金欽將兵至古泗，爲百濟所邀敗，自葛嶺遁還。今泗州相近有葛嶺道云。萬曆中倭據泗州，謂之中路，北倚晉江，南通大海，爲東西聲援，大帥董一元克之，尋復敗還。○晉州城，在粵州西南。萬曆二十六年大帥董一元擊泗州，倭進取晉州，乘勝渡江南，毀永春、昆陽二寨，倭退保泗州老營，一元奪其城，進逼新砦。寨三面臨江，一面通陸，引海爲濠，海艘泊寨下千計。又築金海、固城二寨，爲左右翼，中通海陽倉，一元攻之不克，敗還晉州。又有咸陽城，在晉州西北，朝鮮之咸陽縣也。萬曆中倭犯咸陽、晉州，即此。

梁山城，在蔚山城東南，朝鮮之梁山郡也。萬曆中麻貴攻蔚山，遣別將屯此，以絕釜山彥陽之援。又有永川郡，在梁山東南。又東與慶州接境。○昌寧城，在晉州東，朝陽所置縣也。《圖經》：「昌寧縣南濱晉江，江之南爲固城縣，縣南有唐浦，爲濱海津要處。」

安東城，在慶州西，朝鮮之安東府也。志云：「府當馬嶺之南，爲東出慶州之道。又義城在安東城西，朝鮮之義城縣也，亦曰宜城。萬曆二十五年督臣邢■等議攻倭酋清正於慶州，分兵屯義城，東援慶尚，西扼全羅雲。

陝川城，在慶州東北，朝鮮之陝川郡也。萬曆二十二年李如松復王京，分兵屯禦於此。又東南曰熊川郡，東濱大海。○七重城，在慶州北境，境內又有買肖城。唐上元二年新羅拒命，遣劉仁軌討之，大破之於七重城，詔以李謹行爲安東鎮撫大使，屯新羅之買肖城，以經略之。新羅屢敗，乃遣使入貢，且謝罪雲。

島山，在蔚山南。萬曆二十五年麻貴等攻蔚山倭，倭悉走島山，於山前連築三寨拒守。島山視蔚山城高，倭又於上新築石城，堅甚，官軍攻之不克，尋潰還。

釜山，志云：「在朝鮮東萊縣南二十一里，西北去王京千四百里，濱大海，與日本對馬島相望，揚帆半日可至。其東有東來、機張、西生、林_田郎、五浦爲左臂，西有安骨、安窟、嘉德、熊川、森浦、巨濟、閒山、德橋、金海、竹島、龍堂爲右臂，聯絡犄角，可攻可守。萬曆二十年倭酋平秀吉遣其黨行長等擁舟師逼釜山鎮，陷慶尚道，尋入王京。既而棄王京，還屯據釜山，增築西生、機張等處，分兵拒守，而以釜山爲根本，官兵攻之不能克，久之，始解去。《圖經》云：「釜山去南原府七百里，是也。」

烏嶺，在慶州西北境西接尚州界。廣亘七十餘里，懸崖_田削，中通一道如線，灌木叢雜，騎不得成列，朝鮮指爲南道雄關。萬曆二十一年倭棄王京遁，別將劉_廷自尚州追至烏嶺，倭方拒險，別將查大受自忠州逾槐山監，出烏嶺後，倭大驚，前移釜山浦，爲久駐計。

竹島，在慶州境西南濱海。萬曆二十五年倭泊於釜山，往來竹島，漸逼梁山、熊川，既而奪梁山，遂入慶州。又巨濟島，在竹島東濱海，朝鮮置

巨濟縣，兼置水軍營於此，衝險次於釜山。○閒山島，在慶州西南境，朝鮮西海水口也。右嶂全羅道之南原府，爲全羅外藩，一失守，則沿海無備，天津、登、萊，皆可揚帆而至。其相近者又有■山島，萬曆二十五年倭入慶州，侵閒山，夜襲■山島，官軍潰走，遂失閒山，倭進圍南原，陷之。

《一統志》全州南海中有闌山島，即閒山矣。

平壺島， 在南海中。元至元十八年遣範文虎帥兵擊日本，道出高麗，航海至平壺島，颶風敗舟，遂還，棄士卒十餘萬於島中日本襲殺之，還者百無一二。

三浪江， 在梁山郡南。志云：「梁山西北有峻嶺，上容雙馬，路險絕。南有三浪大江，直通金海竹島。萬曆中倭奪梁山，三浪遂入慶州。○晉江，在慶州西南，泗州城北，或謂之西江，東南注於海。萬曆中麻貴攻蔚山，遣兵屯西江口，防倭水路援兵，即此。

發盧河，在慶州西界。志云：「在高麗南界，新羅七重城之北。唐咸亨四年李謹行破高麗叛者於瓠盧河之西，即此水也。又咸亨五年劉仁軌東伐新羅，率兵絕瓠盧河，攻其大鎮七重城，破之。

西生浦，在蔚山郡南五十三里。其相近者曰機張監。又有開雲浦，在蔚山郡南五十二里。○甘浦在慶州東二十里。《圖經》：「甘浦相近者有長■浦。又安骨浦，在熊川郡南二十里，其相近者，又有天城浦。

金浦，《圖經》：「左晉州南，即晉江南入大海處也。元至元二十二年議徵日本，勅漕江淮數百萬石，泛海貯於高麗之金浦，仍令東京及高麗各貯米萬石，備徵日本，期明年八月，悉會金浦。不果行。《元史》作合浦，悞也。

忠清道，治忠州，在王京南面。本馬韓舊壤。志云：「王京居八道之中東隘爲烏嶺忠州，西隘爲南原

全州。又云：「王京爲朝鮮都會，咸鏡、忠清爲犄角，並稱天險。今領郡四：「曰清風、溫陽、天安、臨川，州九：「曰忠州、清州、公州、矜州、靖州、幸州、興州、禮州、洪州，縣七曰：「永春、報恩、連山、扶餘、石城、燕岐、保寧。

公州城， 在忠州西南境。其東南近全羅道之南原府。萬曆二十五年倭入南原，麻貴發兵屯公州以拒之，即此。又清州城，在忠州西，其東接天安郡，郡西南接公州界。

稷山， 在忠州西，有稷山監。萬曆二十五年倭陷全羅，引而北，麻貴發兵守稷山，以遏其鋒。又有青山，與稷山相近。志云：「稷山之南，即天安郡城南，下全州之要道也。○洪州山，在忠州西境海中。《一統志》：「洪州建於山下，稍東有東源山，產金。又有富用山，亦在洪州海中上有倉谷，故名。俗訛爲芙蓉山。

竹嶺， 在忠州東。羊腸繞曲，頗爲險峻。萬曆中倭棄王京，逾竹嶺，走慶尚，即此。○唐島，

在清州海中亦曰唐人島，與九頭山相近。又有馬島，亦在清州海中國中牧地也。舊有客館曰安興亭，與軋子苦相近。又有雙女[■]焦，亦在清州海中。

白馬江， 在清州南。《圖經》：「「矜州南有白馬江，南流入清江界，折而東，又東北經天安郡界，折而北，其下流合於漢江。」

咸鏡道， 治咸興府，在王京之東北面。本沃沮高句麗之地。今領郡三：「「曰端川、蜀莫、寧遠。府五：「「曰咸興、鏡城、會寧、永興、安邊。州有八：「「曰延州、德州、開州、惠州、蘇州、合州、燕州、隋州。縣一，曰利城。」

開州城， 在咸興府西北。《遼志》云：「「本[■]貊地，高麗置慶州，勃海爲東京龍原府。都督慶、鹽、穆、賀四州，疊石爲城，周二十里，阿保機平勃海，城廢。隆緒伐新羅還，復加完葺，置開封府開遠軍，又改爲開州鎮國軍。契丹未入於高麗，或謂之蜀莫郡。《圖經》：「「郡在開州之

東。又開遠廢縣，故開州治也。《遼志》云：

「本柵城地，高麗爲龍原縣，慶州治焉。勃海因之，契丹初廢，後復置。○熊山城，在開州西。

《遼志》：「唐薛仁貴徵高麗，與其大將溫沙門戰熊山，擒善射者於石城。石城即開州城也。勃海時，龍泉府統縣六，曰龍原、永安、烏山、璧谷、熊山、白楊。契丹初皆廢。

鹽州城， 在開州西北。《遼志》：「州去開州百四十里，本勃海置，亦曰龍河郡，統海陽、接海、格川、龍河四縣，遼初皆廢，而鹽州仍舊。又穆州城，在開州西南百二十里，勃海置，亦曰會農郡，領會農、水岐、順化、美縣等四縣，遼仍曰穆州，治會農縣。又賀州城，亦勃海置。亦曰吉理郡，領洪賀、送誠、吉理、石山四縣。遼皆廢，仍曰賀州，與鹽、穆二州，俱隸於開州，後沒於高麗。

德州城， 在咸興府西南。唐置，後因之。元仍置德州，領江東、永清、通海、順化四縣，寧遠、柔遠、安戎三鎮，後沒於高麗，仍曰德州。又延州城，在咸興府西北。亦唐置，後因之，元仍曰延州，領陽嶺一鎮，今仍舊。○大行城，亦在咸興

府西南境。唐乾封三年李^勣等敗高麗於薛賀水，進拔大行城，於是諸軍皆會，又進至鴨綠柵云。

高句驪城，在咸興府東北。漢縣，爲玄菟郡治，後漢因之。志云：「縣本高句驪國地，其國又在玄菟東北，分爲五部，漢滅朝鮮，開高句驪地，仍封其種人爲高句驪侯。建武中改封爲王，和帝元興以後，屢犯遼東玄菟塞。延光中稍葺伏。

《後漢書》：「武帝以沃沮爲玄菟郡，後爲夷貊所侵，徙郡高句麗西北，更以沃沮爲縣，屬樂浪東部都尉。建安中公孫康擊破高麗國，高麗王伊夷模兄拔奇詣康降，還住沸流水。伊夷模更作新國都於丸都之下，拔奇遂住遼東。今考咸興府在朝鮮東北境，又東迫於海，在咸興東北者當是故沃沮城。而高句麗則在咸興府西蘇州開州縣，至伊夷模又南徙也。《後漢紀》：「高句麗在遼東東千里，南與朝鮮接，東與沃沮接。是也。晉玄菟郡仍治高句麗縣，非故治也。

不而城，在咸興府北，漢縣，屬樂浪郡，東部都尉治此，後漢廢。魏正始中幽州刺史^丘儉擊高句麗，屠丸都，銘不耐城，即此。耐而通，陳壽曰：「漢武置樂浪郡，自單單大嶺以西，屬樂

浪，自嶺以東七縣，都尉主之，皆以[]爲民，所謂不耐[]也。

蘭秀山，在開州西，洪武五年高麗國王請徵蘭秀山逋寇，詔止之。○摩天嶺，在咸興府東北，朝鮮謂之東北雄關。《一統志》：「延州東南有香山，亦府境大山也。」

薩賀水，在開州西南，一作薛賀水。唐乾封三年李[]等伐高麗，別將薛仁貴克扶餘城，高麗趨救，與李[]遇於薛賀水，合戰，[]大破之，進拔大行城。是也。志云：「薛賀水出北山中東南流入鴨綠江。」

平安道，治平壤府，朝鮮西京也。東南去王京五百餘里。漢曰樂浪郡，後爲高麗王所都。亦曰長安城，一名王險城。唐平高麗，置安東都護府於此，後沒於勃海。《遼志》：「唐中宗賜勃海大氏所都名曰忽汗州，即故平壤城也。尋自號爲中京顯德府，阿保機攻拔之，以爲東丹王國。五代時，高麗復取之，爲西京。元至元六年其臣李延齡等以西京府州縣六十餘城來屬，因

改西京爲東寧府，升東寧路，割靜州、義州、麟州、威遠鎮屬婆娑府，餘俱領於東寧，其城治類皆廢毀，僅有空名耳。元末復歸於朝鮮。今領郡十一，曰嘉山、價川、郭山、雲興、熙川、宣川、江東、慈山、龍川、順川、博川；府九，曰平壤、成川、定遠、呂城、合蘭、廣利、見仁、寧邊、江界；州十六，曰安州、定州、平州、義州、鋼州、鐵州、靈州、朔州、撫州、宿州、渭州、買州、青州、升州、常州、銀州；縣六，曰土山、德川、陽德、江東、中和、泰州。

王險城，即平壤城。應劭曰：「箕子故都也。薛瓚曰：「王險在樂浪郡，溟水之東。漢初燕人衛滿渡溟水，居上下障，都王險。武帝元封二年其孫右渠拒命，遣樓船將軍楊僕自齊浮勃海，左將軍荀彘出遼東誅之，取其地，改置朝鮮縣，樂浪郡治焉。晉永嘉已後，沒於高麗。義熙末其王高璉居平壤城，亦曰長安城。隋大業八年伐高麗，分軍出朝鮮道，謂此。《隋書》：「平壤城東西六里，隨山屈曲，南臨溟水。開皇十八年伐高麗，命周羅侯將水軍自東萊泛海趨平壤，不能達而還。大業八年詔左右各十二軍分道伐高麗，總集平壤。明年，復遣宇文述等趨平壤，述不克至。唐貞觀十八年伐高麗，命張亮以舟師自海道趨平壤，明年，拔遼東諸城，攻安市未下。江夏王道宗請以精卒乘

虛取平壤，既而降將高延壽，亦請自烏骨城直取平壤，不果。龍朔初命蘇定方等討高麗，進圍平壤，不能拔。總章三年李^勣徵高麗，拔其平壤，而高麗亡。杜佑曰：「平壤即王險城也。五代時，王建據高麗，始謂之西京上下障，樂浪舊有長城，燕所築，謂之雲障云。

保州城， 在平壤西北百餘里。《遼志》：

「高麗置，治來遠縣。契丹開泰三年以高麗王詢擅立，問罪不服，取其保、定二州，仍置保州，治來遠縣。亦曰宣義軍。金初以高麗臣附，割保州與之，即今安州也。其相近者有懷化軍，亦遼開泰三年置，隸保州，金初亦入於高麗。○宣州城，在平壤東北二百餘里，唐置，屬安東都護府，遼仍曰宣州，亦曰定遠軍。《遼志》云：「開泰三年置，隸保州，蓋勃海廢，遼復置也。元亦曰宣州，屬東寧路，領寧朔、羣島二鎮，即今之宣川郡。

定州城， 在平壤西北三百餘里，高麗置，治定東縣。契丹取之，仍曰定州，亦曰保寧軍。後入於高麗，今仍爲定州，西南與義州接界。○義州城，在平壤西北四百二十里。志云：「義州西南爲龍川郡，皆濱鴨綠江，萬曆二十年朝鮮王李^倣公

以關白之亂，走義州請內屬，即此。又鐵州城，亦在平壤西北，唐所置州也。元亦置鐵州，領定戎一鎮，今仍曰鐵州。又西北曰靈州，亦唐置，元因之，今仍舊。又熙州城，在鐵州東北，唐置，元因之，今曰熙川郡。又東曰撫州，亦唐置，元因之，今仍舊。

定遠城， 在平壤北。志云：「唐所置也，屬安東都護府，後廢置不一，元亦曰定遠府，今因之。其南曰慈州城，亦唐所置，元因之，今爲慈山郡。○泰州城，在定遠府西，亦唐置，元因之。今曰泰川縣。

郭州城， 在平壤西北，亦唐置，勃海因之，後屬於契丹。《載記》：「初契丹以鴨綠江北予高麗，高麗築興、鐵、通、龍、龜、郭等州，凡六城。宋大中祥符五年契丹怒高麗擅弒立，又不入朝，議復取六州地。有女真人告契丹，謂自開京東馬行七日，有大寨，廣若開京，凡旁邑所貢珍異皆在焉。其勝、羅等州之南，亦有二寨，所積如之。若大軍自女真北渡鴨綠江，並大河而上，至郭州，與大路會，高麗可取也。七年契丹遣耶律世良、蕭

屈烈，與高麗戰於郭州，破之。元亦置郭州於此，今日郭山府。

鋼州城，亦在平壤西北，高麗所置州也。宋祥符中契丹擊高麗，高麗將康肇敗保銅州，爲契丹所擒，即鋼州矣。其相近又有費、貴等州。或曰：「費州，今買州之訛也。貴州，今渭州之訛也。又嘉州城，亦在平壤西北，唐置，元因之。今日嘉山郡，西接義州境，東接安州境。○朔州城，在平壤北境。志云：「在熙川城東北，唐置，元因之，今日亦曰朔州。又東北有昌州城，亦唐時故名也，元因之，今日昌城府。

雲州城，在平壤東北。唐置，元因之。今日雲興郡。又東北有博川城，高麗所置也，今日仍曰博川郡。西南與慈山郡接界，東與價川郡接界。志云：「郡城西有大定江，或謂之大寧江，江之西岸，有凌漢山。○成州城，在平壤東，唐置，元因之，領樹德一鎮，今日成川府。又北曰順州，今日順川郡。順州之西，曰價州，今日價川郡，皆唐舊名，元因而不改。

宿州城， 在平壤東北百餘里。唐置，元因之。今仍舊。又東北曰殷州城，亦唐舊名，元因之，今仍曰殷州。○江東城，在平壤東，高麗所置也，在大同江東岸，今日江東郡。志云：「郡逼臨江岸，渡江而南，即中和縣。宋嘉定九年契丹部酋六哥竄入高麗，據江東城，女真阿骨打遣兵攻滅之。又《里道記》：「自黃海道之黃州、鳳州，至中和，去王京不過三百六十里，自中和縣而東，即土山縣也。二縣亦唐所置，元因之，屬東寧路，今仍舊名不改。

淶州城， 在平壤西境。《遼志》：「高麗故國也。勃海置西京鴨淶府，城高三丈，廣輪二十里，都督神、桓、豐、正四州，領神鹿、神化、劍門三縣。契丹改置淶州鴨淶軍，統弘聞、神鄉二縣，後廢。又桓州城，志云：「在淶州西南二百里，高麗謂之中都城，領桓都、神鄉、湨水三縣，契丹廢縣存州，仍隸淶州。《遼志》：「高麗王創立宮闕於此，國人謂之新國。五世孫釗當，晉康帝建元初爲慕容■所敗，宮室焚燬。遼末州廢。豐州城，舊志：「在淶州東北二百十里，勃海置

州，亦曰盤安郡，領安豐、勃恪、隰壤、硤石四縣，契丹廢縣存州，仍隸淶州，後廢。

正州城， 舊志：「在淶州西北三百八十里，本沸流王國故地，爲公孫康所並。勃海置正州於此，亦曰沸流郡，以沸流水而名。契丹因之，仍隸淶州，後廢。又東那城，在正州西七十里，勃海置。契丹因之，仍屬正州，後廢。慕州城，在淶州西二百里，本勃海安遠府地，領慕化、崇平二縣。

契丹改置慕州，屬淶州，後廢。

粘蟬城， 在平壤西南。蟬，音提。漢縣，屬樂浪郡。後漢曰粘蟬。晉省。隋大業八年伐高麗，分軍出粘蟬道，蓋以漢縣名也。洪邁曰：「樂浪之粘蟬爲粘提，南海之番禺爲潘愚，蒼梧之荔浦爲隸浦，交趾之羸婁爲蓮萑，此皆土俗之別也。○遂成廢縣，在平壤南境，漢縣，屬樂浪郡，後漢、魏、晉皆因之。《晉志》曰：「秦築長城，蓋起於此。隋大業八年伐高麗，分軍出遂成道，謂此也。杜佑曰：「碣石山在漢遂成縣，秦築長城，起於碣石，今遺址東截遼水，而入高麗。蓋本《太康地志》之說，其實悞也。

帶方城， 在平壤南。漢縣，屬樂浪郡。公孫度置帶方郡於此，晉因之，後沒於高麗。杜佑曰：「後漢建安中公孫康分屯有、昭明二縣以南荒地置帶方郡。《漢志》注：「樂浪郡南部都尉治昭明。是也。隋大業中伐高麗，分軍出帶方道。顯慶五年平百濟，改置帶方州。○增地廢縣，亦在平壤南境，漢縣，屬樂浪郡，後漢因之，晉省，隋伐高麗，分軍出增地道云。

積利城， 在平壤西境。唐貞觀二十一年遣牛進達等自海道入高麗，拔其石城，進至積利城下，敗其兵。其相近者又有泊灼城。貞觀二十二年薛萬徹等伐高麗，圍泊灼城而還。志云：「自鴨綠江口舟行百餘里，又小舫溯流，東北三十里，至泊灼口，即泊灼城矣。石城，見寧遼衛。○加屍城，在平壤西南，高麗置。唐貞觀十八年伐高麗，蓋蘇文遣嘉屍城七百人戍蓋牟城，是也。

辱夷城， 在平壤西北。唐總章元年李^勣等敗高麗於鴨綠柵，追奔二百餘里，拔辱夷城，遂進圍平壤，高麗平。是也。又伐奴城，亦在平壤西北，唐咸亨二年行軍總管李謹行破高麗叛者於瓠蘆河

西，其妻劉氏留伐奴城，高麗引靺鞨來攻，劉氏拒卻之。或曰：「城在營州境內，恐悞。」

馬邑山，在平壤西南。唐顯慶五年蘇定方破高麗軍於湨江，奪馬邑山，遂圍平壤，即此。又蓋馬大山，在平壤城西。《漢志》：「玄菟郡有西蓋馬縣，山蓋因以名。又有魯陽山，在平壤城東北，上有魯城。○葦山，在平壤西南二十里，南臨湨水。」

觀門山，在土山縣北。縣東南又有花山，皆縣境之大山也。又屈岩山，在定遠府城東，以岩岫屈曲而名。○雲山，在朔州西南。又有馬頭山，在靈州之東。長花山在鐵州西南，天聖山在殷州東北。

熊花山，在郭山郡東北。又有靈山，在宣川郡東南。龍骨山在龍山郡城東。○小鐵山，在鴨綠江東岸，義州境渡江處也。又西南爲遼東境內之僧福島及皮島云。

慈悲嶺， 在平壤東百六十里。宋淳熙二年高麗西京留守趙位寵慈悲嶺至鴨綠江四十餘城附金，金人不納，位寵伏誅。元至元六年高麗臣李延齡等以西京以下六十城來歸，元因改置東寧路，以慈悲嶺爲界云。○嘉山嶺，在嘉山郡西，郡以此名。

《圖經》：「朔州西北有狄喻嶺，朝鮮謂之西北雄關。」

青丘， 或曰在高麗境。《子虛賦》：「秋獵於青丘。蓋謂此。服虔曰：「青丘國在海東三百里，《晉·天文志》有青丘七星，在軫東南，蠻夷之國也。唐討高麗，置青丘道行軍總管雲。」

大通江， 在平壤城東。亦曰大同江，舊名沮水。《史記》：「秦修遼東故塞，至沮水爲界。漢初燕人衛滿亡命，東走出塞，渡沮水，居秦故空地上障，稍役屬其真番朝鮮蠻夷及燕亡命者王之。元封三年荀彘自遼東擊朝鮮，破其沮水上軍，乃至王險城下。《漢志》：「樂浪郡有沮水縣。沮，音普大反。沮水西至增地縣入海，王險城蓋在沮水之陽。《水經》云：「沮水出樂浪鏤方縣，東南過臨沮縣，東入海，悞矣。隋大業八年伐高

麗，來護兒率江淮水軍自東萊浮海先進，入自淇水，去平壤城六十里，尋爲高麗所敗，還屯海浦。唐龍朔元年蘇定方伐高麗，敗其兵於淇水江，遂趨平壤。明萬曆二十一年李如松援朝鮮，至平壤，倭悉力拒守，如松度地形東南並臨江，西枕山陡立，惟迤北牡丹峰高聳，最要害。如松乃遣將攻牡丹峰，督兵四面登城，遂克之。既而如松駐開城，別將楊元軍平壤，扼大同江以通餉饋，是也。

清川江，在安州城東。西南流入海，亦名薩水。隋大業八年宇文述等擊高麗，渡鴨淥水，追擊其大臣乙支文德，東濟薩水，去平壤城三十里，因山爲營。平壤險固，不能猝拔，引還至薩水，軍半濟，爲高麗所擊，諸軍皆潰，將士奔還，一日夜至鴨淥水，行四百五十里。今亦謂之大寧江。志云：「平壤、黃州，西隔大寧江，東阻大通江，所謂兩江之中也。○沸流江，在江東郡南，自漢江分流，西合於大同江。《一統志》：「靈州東有大江，西北入於大通江。」

鴨淥江，杜佑曰：「在平壤西北四百五十里。《漢志》所謂馬訾水也。高麗每恃爲天險。今

詳遼東都司。

■也水， 在平壤西境。唐龍朔初龐孝恭等擊高麗，以嶺南兵壁於■水，爲蓋蘇文所攻，一軍盡沒。或謂之陀水。宋大禧二年契丹伐高麗，戰於茶、陀二水，敗而還。志云：「二水俱在平壤西北。」

晏家關， 在義州西南。當鴨淥水東岸，舊爲津要。○潼關堡，在平壤西境，亦朝鮮所置戍守處也。

肅寧館， 在平壤西北。《圖經》曰：「肅寧館之西曰定州，東曰安州。萬曆二十年李如松援朝鮮，逾鴨淥江，至肅寧館，越二日抵平壤。即此。」

已上朝鮮

女真在遼東都司東北千七百餘里。自其國混同江至京師三千五百里，至江南江寧府四千六百里。

其地東瀕海，南鄰朝鮮，西接兀良哈，北至北海。古曰肅慎，後漢曰挹婁，元魏曰勿吉，隋曰靺鞨。其種分爲七部：「一粟末部，與高麗接。二伯咄部，在粟末之北。三安車骨部，在伯咄東北。四拂涅部，在伯咄之東。五號室部，又在拂涅之東。六黑水部，在安車骨西北。七白山部，在粟末東南。白山、粟末皆近邊，惟黑水居極北，尤強盛。開皇十八年高麗王湯帥靺鞨之衆萬餘寇遼西。唐貞觀二年黑水渠長阿固郎來朝，因置燕州授之。開元十四年黑水靺鞨遣使入見，以其國爲黑水州。尋又置勃利州及黑水府，以部長爲都督。貞觀以後，勃海盛強，黑水後服焉。五代初契丹滅勃海，黑水靺鞨因附於契丹，復有黑水故地。契丹遷其豪數千家於遼陽南合蘇館，是爲熟女真，亦曰南女真。其界外野處不入遼東籍者，爲生女真，亦曰北女真。又極邊遠者，號黃頭女真。而黃頭勇敢者則謂之回霸。後避契丹興宗諱，改真曰直。生女直曰強，建國曰金，既滅遼，以所興地爲上京會寧府，領曷懶等路。金末城邑多毀於兵火。元因其土地曠遠，人民散居，設軍民萬戶府五，撫鎮北邊，一曰桃溫，一曰胡里改，一曰斡朵憐，一曰脫斡憐，一曰孛苦江，分領混同江南北水達達及女真之人，各仍舊俗，無市井城郭，逐水草爲居。復置合蘭府水達達等路，以統攝之。明永樂二年部族漸來歸附，

置建州等九衛。明年，復置毛憐等六衛。四年置古賁河等三十九衛。五年置阿古河等三十一衛。六年又置納木河等三十衛。七年置卜魯兀等十七衛，並置兒於都司以統之。八年又增置木興河等十一衛。明年，復置督罕河一衛。十年置建州江等十三衛。十一年置斡朵輪一衛。十二年置哈兒分等十二衛。十三年又置渚冬河等四衛。十四年置吉灘河等二衛。十五年置阿貢同真等四衛，凡衛一百八十。又置兀者托溫等千戶所二十，及地面城、站等凡五十八處，以授其大小酋長，蓋悉境皆奉朝貢矣。正統中復置建州右等五衛。自是數有增置。萬曆中有衛三百八十四、所二十四、站七、地面七、寨一，曰黑龍江忽里平寨。其間種族互相吞噬，或存或否，惟建州最強。天順三年建州酋董山叛，降朝鮮。成化二年寇遼東。十四年建州夷復寇遼東。詔遣馬文升撫定之。十五年陳鉞等討建州。既而建州復寇遼東，久之始順命。說者謂：「建州之地，獨居諸部族中據要害，東接毛憐野人、黑龍江諸夷，東北雜兀者諸衛，西北鄰兀良哈，背枕長白山，面臨鴨綠江，有山四面鬥絕。建州結老寨於此，左曰董古寨，右曰新河寨，前曰閻王、牛、毛、甘孤裡、古墳、板橋等六寨，逼近開元。而開元所恃爲屏蔽者，惟在北關，其清河、撫順及三岔、撫安、柴河、靖安、白家衝、松子等堡，皆開元以南、遼

瀋以北，肘腋要害也。從老寨西襲則撫順關，北掠則靖安堡，南叩則鴉鶻關，東擾則晾馬佃。若渡渾河，過五嶺關，則至撫順。越二道關，抵三岔堡，則至靖安。若由甘孤里而古墳而板橋而柳木而卜餘，則向晾馬佃及鴉鶻關一帶矣。蓋卜餘爲建州第一關隘，由東南路向建州，卜餘寨其必爭之險也。志云：「建州阻萬山中林木參天，蹊徑盤錯，有五嶺、喜昌、石門爲險厄，若縱橫四出，犄角前進，往往可以得志。若自遼陽向建州，則鎮江、寬奠、陽、清河，皆有徑可前。由瀋陽向建州，則撫順爲大路。由鐵嶺向建州，則三岔爲要途。由開元而進，則東川亦捷徑也。建州而外，居開元東北者，謂之海西。居建州之東者，謂之毛憐，亦曰野人，皆黑水苗裔。又近開元北邊松花江者，謂之山夷。其種皆倚山作寨，或謂之熟女真種。北抵黑龍江者，謂之江夷，或以爲生女真種。其灰扒、兀刺等族，類皆江夷種也。諸族之中以海西、毛憐、建州爲最大，後毛憐漸微。大約自瀋陽、撫順關而北者，其地多屬於海西。自陽、清河堡而抵鴨綠江，其地皆屬於建州。其後，海西亦折而入於建州矣。建州蓋勃海之苗裔雲。

廢會寧城， 一名海古城。西南接三萬衛界，
即勃海上京龍泉府之地也。女真初起於此。阿骨打

既滅遼，置會寧州，完顏晟升爲會寧府，建上京，兼置會寧縣爲府治。海陵帝廢上京，尋復舊。元廢。又曲江城，在會寧府東北。金大定七年置鎮東縣，屬會寧府，尋改治曲江。又有宜春城，亦大定七年置，屬會寧府，元初與府俱廢。

肇州城， 《金志》云：「在會寧西五百里鴨子河、黑龍江之側，舊名出河店。宋政和四年女真取寧江州，遼人使其將蕭嗣先等發兵，屯出河店，阿骨打御之，至混同江。遼兵方壞凌道，阿骨打擊走之。遂帥衆繼進，登岸大破遼兵於此。完顏晟因置肇州，謂肇基王蹟者也。亦曰武興軍，治始興縣。金末廢。

黃龍府城， 在會寧西北。《遼志》：「在勃海扶餘府。阿保機未有黃龍見於此，因名。石晉開運三年契丹以晉主重貴爲負義侯，置於黃龍府。《五代史》：「自幽州行十餘日，過平州，出渝關，行沙磧中七、八日，至錦州。又行五、六日，過海北州。又行十餘日，渡遼水，至勃海鐵州。又行七、八日，過南海府，遂至黃龍府。府北至混同江一百三十里。宋開寶四年契丹主賢以軍將燕頗叛，府廢，改曰龍州，俗仍謂之黃龍府。政和五年

阿骨打將攻遼黃龍府，進薄益州，又敗遼兵於達魯古城，逐北至阿婁關。既而阿骨打次混同江，乘馬以濟，遂克黃龍府，後因改府爲濟州，兼置利涉軍。紹興中岳武穆嘗言：「直抵黃龍，與諸軍痛飲。蓋以北狩擬於石晉之禍也。金天德四年又升爲濟州路。大定二十九年改曰隆州。貞祐初又升爲龍安府，治利涉縣。時蒙古兵起，遼人耶律留寄聚衆隆安，至十餘萬，遣使附蒙古。金人討之，爲所敗，遂自立爲遼王。元初以其地併入開元路。○廢益州，在黃龍府東北，遼置，統靜遠縣。又黃龍縣，即故黃龍府治也。《遼志》：「黃龍府統縣三，曰黃龍、遷民、永平；州五，曰益州、安遠州、威州、雍州、清州。金廢入龍州利涉縣。

廢寧江，州在會寧西北。契丹置。亦曰混同軍，統混同縣。其東北又有寥晦城。宋政和四年女真初取寥晦城，會諸部兵於入流水，乃陷寧江州，進敗遼兵於混同江，即此。州尋廢。○廢賓州，在黃龍府東。本勃海城，契丹置州於鴨子、混同二水之間，尋曰懷化軍。女真敗遼軍於斡鄰灤，東取賓、祥、威三州，進薄益州，是也。金州廢。又廢祥州，在賓州西南。契丹置祥州瑞聖軍，統懷德縣，屬黃龍府，金廢。威州，今見鐵嶺衛。

廢河，州在黃龍府北。遼置河州德化軍，有軍器坊，金廢。《一統志》：「開元東北五百里有穩禿河，源出坊州北山，北流入松花江。所謂坊州，疑即河州矣。○斡魯古城，在黃龍府境。女真叛遼，侵黃龍府，轉趨斡魯古城，敗遼兵。或曰：「即達魯古城也。又廢蒼海郡，在會寧北境。漢元朔初東夷穢君、南閭等降，爲蒼海郡，尋罷。賈捐之云：「武帝東置蒼海郡，西置朔方之州，是也。

五國頭城，在會寧府東北。自此而東，分爲五國，因名。《遼金紀事》：「海東青出於女真東北鐵甸等五國，遼主延禧酷愛之。每歲天寒，發使趣女真，以海東青入貢，發甲馬數百取之。五國索於巢穴中往往戰爭而得。國人厭苦。《宋史》：「建炎二年金人徙二帝於韓州之五國城，去其上京千里云。韓州，見三萬衛。

廢胡里，改路《金志》：「在會寧東六百三十里，北至邊界合里賓忒一千五百里。初置萬戶府於此，海陵時罷。金主璟承安三年置節度副使於此。元曰胡里改軍民萬戶府。《元志》：「胡里

改距上都四千二百里，大都三千八百里。又有桃溫路，去上都四千里。○廢蒲與路，《金志》：

「在會寧府北六百七十里，初置萬戶府，後更爲蒲與路。自此西北至火魯火曠謀克三千里，乃金北邊之極界也。元廢。

廢昌懶路，《金志》：「在會寧東南千八百里。亦曰合懶路。自此而東南，至高麗界五百里。元廢。○廢卹品路，《金志》：「在會寧東南千六百里。故率賓國地，遼置率賓路，金曰卹品路，亦曰速頻路。西南至合懶路一千二百里，北至邊界幹可阿憐千戶二千里。亦元廢。

長白山，在會寧南六十里，西南去三萬衛千里。其山橫亘千里，高二百里。巔有潭，周八十里，淵深莫測，南流爲鴨綠江，北流爲混同江，東流爲阿也古河。

馬鞍山，在會寧東南。《一統志》：「山在開元城東北四百里，建州衛東。悞也。建州在開元東南。又■溪山，《一統志》云：「在開元東

七百四十里松花江東岸。舊志：「勿吉國南有祁黎山，又有太山，俱女真境內之大山也。

冷山，在會寧東北二百里。宋洪皓使金，金人流遞之於冷山。其地苦寒，穴居者僅百餘家而已。舊志：「會寧境內有青嶺，又有馬紀嶺，俱高險。

混同江，在會寧西南。舊志：「在開元北千五百里，源出長白山。一名粟末河，粟末靺鞨所居也。江面闊三里餘，經會寧之西，東北流達五國頭城北，又北合松花江，東入海。《宋史》：「金烏古乃時，自東沫江之北、寧江之東，地方千餘里。東沫，即粟末之訛也。胡三省云：「金人謂鴨綠江爲混同江。

松花江，在會寧東南。舊志：「在開元東北千里。本名宋瓦江。亦出長白山，東北流經會寧府之東。其北則有忽刺溫江諸水流入焉，南則有灰扒江諸水流入焉。下流合於混同江。○忽刺溫江，志云：「出女真北山，南流入松花江，南去開元

九百餘里。又灰扒江，出瀋陽廢貴德州東北山中東北流入於松花江，西去開元城三百五十里。

胡里改江，志云：「出建州衛東南山中東北流爲鏡泊，又北入混同江。金胡里改路以此名也。○黑龍江，舊志：「在開元北一千五百里，源出北山，黑水靺鞨舊居此。南流入松花江。或云：「混同江北流，經灰扒地名灰扒江，過兀刺亦地名兀刺江。又北至海西苦兀東入海。通名烏龍江。兀刺，即忽刺之訛也。又境內有潑豬江，或曰即黑龍江之別名。又上木江，志云：「在開元東北千餘里，亦出長白山，流經女真北山，東入海。又阿速江，在開元東北千六百里，下流亦入松花江。

金水河，在會寧西。一名按出虎水。女真謂金爲按出虎，以水源於此，謂之金源，因建國號曰金。其水西北流，與來流水合，西流入於混同江。《一統志》：「金水河出黃龍府東山，北流入松花江。悞。○來流河，在會寧北。源出三衛境馬盂山，東流至黃龍府東，又東南流入女真境會金水河，又東北流入混同江。

哈刺河，志云：「在開元東四百里。源出長白山，流經松山東，又東合灰扒江。又一迷河，志云：「在開元北四百里。源出艾河北山，北流合龍安一禿河入松花江。龍安一禿河，見兀良哈境。○掃兀河，志云：「在開元東北五百七十里。源出建州衛東南山，東北流入禿魯麻河。又禿魯麻河，在開元東北六百里。亦出建州東山，下流入松花江。

合蘭河，在建州衛東，東南流千餘里入海。元合蘭府以此名。又卹品河，在建州衛東南，下流亦合於海。金人卹品路之名以此。又阿也苦河，源出長白山，東流入海。○蘇子河，在建州西近塞。永樂間，建州酋李滿住款塞，駐牧蘇子河，爲邊患。

惱溫河，志云：「在開元北千里。源出長白山，南流入松花江。或謂之託溫江，又訛爲□江。明初女直部野人寇遼東，命將宋晟討之。晟過惱溫江，分兵爲三道，進至錙兒口，與賊戰，敗之。志云：「廢肇州西有洮兒河。又開元西北境

有兀良河，源出沙漠，東南流合洮兒河、惱溫河，俱入於松花江。

理河，志云：「在開元東北千二百里。源出乾乃憐城南諸山，北流入松花江。又徒門河，在建州南，東南流入於海。○忽汗河，在開元東北。志云：「在故靺鞨國。昔勃海大氏居故平壤城，號忽汗州，蓋本於此。」

辟登水，在建州南境，近高麗。宋崇寧三年女真將石適歡破高麗於曷懶甸之境，追入辟登水，逐其殘衆。高麗懼而請和。又有五水，亦在曷懶甸之境。高麗引兵救曷懶甸，五水之兵皆附之，是也。

斡憐灤，在黃龍府東北。宋政和四年女真阿骨打敗遼兵於出河店，又進敗阿蕭敵裡於斡憐灤東。遼濱、祥、威三州及鐵驪□降於女真。明年，遼主延禧親征女真，駙馬□特末將兵至斡憐

灤，是也。○部渚灤，在黃龍府東。阿骨打自燕京還，死於此。吳乞買葬之於海古城西，是也。

駝門寨， 在黃龍府西。宋政和五年遼主延禧親征女真，至駝門。或曰即駱駝口也，在長春州北。長春，見兀良哈境。○爻刺屯，在黃龍府東。遼主延禧討金，先進至斡憐灤。金主阿骨打行次爻刺，議深溝高壘以待之。會遼將耶律章奴作亂，遼主引還，金人追敗之於護步答岡。蓋在混同江之西。

禦子林， 在會寧府境。《宋史》：「紹興八年王倫使人見金主亶於禦子林。即此。○捏怯□部，在會寧東境，女真別部也。又有吾者野人部。元至正三年遼陽路以捕海東青煩擾吾者野人及水達達部。於是二部皆叛。又奴兒乾地，在會寧東南。《元史》：「俊禽海東青由海外飛來，至奴兒乾，土人羅之以爲貢。至治初竄□珪等於奴兒乾地。是也。向置都司及衛於此。」

已上女真

勃海亦靺鞨遺種，隋時粟末部也。初附高麗。唐滅高麗，勃海大氏徙居營州，尋保挹婁之東牟山，高麗、靺鞨稍稍歸之。武后萬歲通天中爲契丹李盡忠所逼，有乞乞仲象者，度遼水自固，武后置勃海都督府授之，又封爲振國公，子祚榮遂盛強，並有扶餘、沃沮、弁韓、朝鮮諸國，地方五千里，建都邑，自稱振國王。睿宗先天初拜爲勃海郡王，所都賜名忽汗州。開元七年武藝襲位，益強，其後皆稱王改元，然仍羈屬於唐。又數傳至夷震，地益拓，徙居忽汗河東，去舊國三百里，稱勃海國王，尋僭號，擬建宮闕，以勃海故地爲上京龍泉府。忽汗州即平壤城也，爲中京顯德府， 貊故地爲東京龍原府，沃沮故地爲南京南海府，高麗故地爲西京鴨綠府，分統十五府，六十三州，爲遼東盛國。其後浸衰，契丹阿保機建國，攻勃海，拔忽汗州，俘其王大 ， 異，勃海遂滅。

挹婁即肅慎。《後漢書》曰：「在夫餘東北千餘里，東濱大海，南與北沃沮接，不知其北所極。在不咸山北，去夫餘□□行，西接寇漫汗國，北接□□，廣袤數千里，人衆雖少，而多勇力，處山險善射。又其國東北有山出石，利於鐵，取爲柝弓，長四尺，矢用楛，長尺八寸，所謂肅慎氏之楛矢石柝

也。其後即爲女真云。夫餘舊志：「夫餘在玄菟北千里，南接高麗，東接挹婁，西接鮮卑。有鹿山，其王所居也。王莽時，班符命東出玄菟、樂浪、高句驪、夫餘，後漢時，屢爲遼東邊患。又爲高句驪所驅率，犯玄菟、遼東諸邊境。《東夷傳》：「永初五年夫餘寇樂浪。建光元年夫餘順命助漢，擊敗高句驪、■貊。永康元年復寇玄菟。晉太康六年鮮卑慕容■東擊夫餘，夫餘王依慮自殺，子弟走保沃沮，■平其國城，驅萬餘人而歸。明年，依慮子依羅復還舊國。永和二年時，夫餘爲百濟所侵，西徙近燕。慕容■遣其子■襲之，禽其王玄及部落五萬餘口而還。其國蓋自是滅亡，地屬高麗。隋大業八年伐高麗，分遣宇文述出扶餘道。唐乾封二年薛仁貴破高麗於金山，進拔夫餘城。夫餘川中四十餘城皆望風降下。金山，即遼東三萬衛西北之金山也，後屬於勃海。後唐天成初契丹拔勃海之扶餘城，命其長子鎮之，曰東丹國。《遼志》：「黃龍府本勃海扶餘府，又通州安遠軍本扶餘王國城。是也。夫，亦作扶。通州，詳見鐵嶺衛歸仁城。」

沃沮有二：「一曰東沃沮，在蓋馬大山之東，亦曰南沃沮，漢武滅朝鮮，開置玄菟

郡，治沃沮城。後玄菟內徙，沃沮更屬樂浪。光武時廢省，就以其渠帥爲縣侯。國小，臣屬於高句驪，後爲所並。《漢志》：「玄菟郡有夫租城，蓋即沃沮矣。魏正始八年，丘儉復伐高驪，其王位宮奔買溝，儉遣玄菟太守王頎追之，過沃沮千餘里，至肅慎氏南界，刻石紀功而還。是也。一曰北沃沮。《後漢·東夷傳》：「北沃沮，一名買溝婁，去南沃沮八百餘里，與挹婁接，高麗名城爲溝婁也。隋大業八年伐高麗，分遣薛世雄出沃沮道，蓋因舊名以命軍也。」

獬服虔曰：「獬在辰韓北，高麗、沃沮之南，東窮大海。漢元朔初其君南閭降漢，因置蒼海郡，三年罷。陳壽曰：「夫餘國有故城，名城。蓋本獬地，今不耐亦其種雲。」

百濟今朝鮮之全羅道即其地，西渡海至越州，南渡海至倭國，王居東西兩城外，置六帶方，管十郡。《地志》：「東夷有三韓國，曰馬韓、辰韓、弁韓。馬韓在西，凡五十四國，百濟居一焉。陳壽曰：「三韓凡七十八國，百濟其一也。後漸強大，兼諸小國，與高句麗相匹，俱在遼東之東千餘里。李延壽曰：「百濟之先，以百家濟海，後

遂以百濟名國。晉世高麗略有遼東，百濟亦分據其地，置遼西、晉平二郡。蕭齊永明六年後魏遣兵擊百濟，爲百濟所敗。八年齊以其王牟大爲鎮東將軍百濟王。隋開皇十八年遣使請伐高麗，願爲軍導，高麗覺之，以兵侵掠其境。《隋書》：「百濟出自東明，後有仇臺者立，始強盛。杜佑曰：「百濟南接新羅，北距高麗千餘里，西限大海，處小海之南，有五部，分統三十七郡，二百城。唐武德四年冊百濟王扶餘璋爲帶方郡王，其後黨於高麗，與新羅相仇，顯慶五年擊平之。詔以其地置熊津、馬韓、東明、金漣、德安等五都督府，又以百濟城爲帶方州，置刺史治焉。《唐史》：「百濟本夫餘別種，其王亦姓扶余氏，濱海之陽，直京師六千里而羸，儀鳳以後，百濟之地，附於新羅，其支屬共保海濱，仍曰百濟。」

新羅今朝鮮之慶尚道即其地，弁韓苗裔也。李延壽曰：「新羅本辰韓種，在高麗東南。亦曰秦韓，相傳秦世亡人避役，東適馬韓，馬韓割東界居之，故名。秦韓始有六國，稍分十二，新羅其一也。或稱魏丘儉破高麗，高麗奔沃沮，後復國，其留者爲新羅，兼有沃沮、不耐、韓之地。其王本百

濟人，自海逃入新羅，遂王其國，附庸百濟，後強盛，與百濟爲敵。杜佑曰：「新羅本辰韓種，魏時爲新盧國，晉、宋曰新羅，其國在百濟東南五百餘里。唐武德四年冊新羅王金真平爲樂浪郡王。顯慶中屢爲高麗百濟所攻，唐爲遣兵平百濟。龍朔初以其國爲雞林大都督府，授其酋金法敏爲都督。上元初新羅據百濟故地，又招納高麗叛衆，遣兵討之，復請降。儀鳳以後，復西據高麗故城，唐不能討。自是僅羈屬於唐而已。開元以後，其地多爲勃海所並。○休忍國，在新羅之東，亦二韓之屬。東晉時有休忍國，服屬於燕，苻秦滅燕，遂屬秦。太元四年苻路以龍城叛，徵兵於鮮卑、烏桓、高句麗、百濟、新羅、休忍諸國，是也。後並於百濟。

耽羅今朝鮮之慶尚南境，亦曰儋羅國。《唐史》云：「居新羅武州南島上，初附百濟，後附新羅。麟德二年遣使入朝，後爲新羅所並。《圖經》：「今濟州，即古耽羅國也。

流鬼東夷也。唐貞觀十四年入貢，去京師萬五千里，其地直黑水靺鞨東北，少海之北，三面接海，南與拂涅、靺鞨鄰。東南航海，行十五日乃至。人依島嶼散居，多沮澤。初

附百濟，後附新羅。杜佑曰：「流鬼國在北海之北。是也。○定安國，本馬韓種。宋太平興國中女真入貢，道出定安，即此。」

About this digital edition

This e-book comes from the online library [Wikisource](#)^[1]. This multilingual digital library, built by volunteers, is committed to developing a free accessible collection of publications of every kind: novels, poems, magazines, letters...

We distribute our books for free, starting from works not copyrighted or published under a free license. You are free to use our e-books for any purpose (including commercial exploitation), under the terms of the [Creative Commons Attribution-ShareAlike 3.0 Unported](#)^[2] license or, at your choice, those of the [GNU FDL](#)^[3].

Wikisource is constantly looking for new members. During the realization of this book, it's possible that we made some errors. You can report them at [this page](#)^[4].

The following users contributed to this book:

- Sayonzei

- Gzhao
- Jusjih
- 鸟甲
- Camphora
- Seccom88

-
1. [↑ https://wikisource.org](https://wikisource.org)
 2. [↑ https://www.creativecommons.org/licenses/by-sa/3.0](https://www.creativecommons.org/licenses/by-sa/3.0)
 3. [↑ https://www.gnu.org/copyleft/fdl.html](https://www.gnu.org/copyleft/fdl.html)
 4. [↑ https://wikisource.org/wiki/Wikisource:Scriptorium](https://wikisource.org/wiki/Wikisource:Scriptorium)